

KELEBIHAN PADA AWAL RAMADAN

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ أَعْمَالِنَا. مَنْ
يَهْدِهِ اللَّهُ فَلَا مُضِلَّ لَهُ وَمَنْ يُضِلِّ اللَّهُ فَلَا هَادِيَ لَهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ أُؤْتِيكُمْ وَايَاتِي بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa-Taala dengan melakukan segala suruhan dan menjauhi segala larangan-Nya. Semoga dengan itu kehidupan kita mendapat keredaan Allah Subhanahu wa-Taala di dunia dan akhirat.

Sidang Jumaat yang dirahamati Allah Subhanahu wa-Taala,

Setelah sebelas bulan hijrah berlalu, kini Ramadan menjelang pula, bulan yang sarat mengandungi keberkatan dan kelebihan daripada Allah Subhanahu wa-Taala kepada hamba-hamba-Nya. Kedatangan bulan yang mulia ini, selebar-lebarnya pintu syurga dibuka kepada umat Islam yang melakukan ibadat puasa dan tertutuplah pintu-pintu neraka. Ramadan lazimnya bercuaca panas dan merupakan bulan yang penuh dengan ujian dan cabaran kepada umat Islam bertujuan meningkatkan ketakwaan dan keperibadian manusia.

Pada bulan Ramadan Allah Subhanahu wa-Taala telah mewajibkan kepada umat Islam menunaikan ibadat puasa yang merupakan salah satu daripada rukun Islam. Firman-Nya dalam surah al-Baqarah ayat 183:

أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن

قَبْلِكُمْ لَعَلَّكُمْ تَتَّقُونَ

Yang bermaksud: *Wahai orang yang beriman diwajibkan kepada kamu berpuasa seperti mana telah diwajibkan pada umat-umat sebelum kamu, mudah-mudahan kamu akan menjadi orang yang bertakwa.*

Sidang jumaat yang dirahmati Allah Subhanahu wa-Taala .

Ramadan melatih dan membimbing kita supaya menjadi insan yang bertakwa dan beribadah secara berterusan sebagai hamba Allah Subhanahu wa-Taala dan membentuk diri dengan nilai-nilai peribadi menjadi seorang yang bertakwa.

Ibadat puasa bukanlah suatu ibadat baharu malah mempunyai sejarah tertua yang diwajibkan kepada penganut-penganut agama yang terdahulu mengikut cara yang berlainan, seperti bangsa Greek Kuno, Romawi, Mesir Kuno, Yahudi dan lain-lain bangsa.

Sidang jumaat yang dirahmati Allah Subhanahu wa-Taala .

Ibadat puasa mempunyai kelebihan dan hikmah antaranya:

Membentuk watak serta peribadi seseorang supaya sentiasa patuh kepada perintah Allah Subhanahu wa-Taala dan menghidupkan kekuatan fikiran dan penglihatan, ini dapat difahamkan dari nasihat Lokman al-Hakim kepada anaknya:

“Wahai anakku, perutmu itu penuh dengan makanan, maka akan tidurlah fikiranmu, tenggelamlah dirimu dalam kenikmatan dan longlailah segala anggotamu untuk beribadat kepada-Nya serta hilanglah keharmonian hati dan kehalusan pemikiranmu, menyebabkan tidak mencapai kelazatan munajat dan mengingati Allah Subhanahu wa-Taala”

Puasa boleh menyihatkan tubuh badan sebagaimana sabda Rasulullah Sallallahu Alaihi Wasallam dalam hadis yang diriwayatkan oleh Imam Al-Tabrani dalam kitabnya Al-Mu’jam Al-Ausot:

وَصُومُوا تَصِحُّوا

Yang bermaksud: *Berpuasalah Kamu Nescaya Beroleh Kesihatan*

Dari sudut masyarakat pula, dengan melakukan ibadat puasa boleh menguatkan hubungan antara orang kaya dengan orang miskin serta menanamkan sifat kasih sayang terhadap fakir miskin dengan cara menghulur bantuan dan pertolongan.

Kesimpulannya, marilah kita menunaikan ibadat puasa dengan penuh keikhlasan kepada Allah Subhanahu wa-Taala dengan mendirikan solat tarawih secara penuh dua puluh rakaat, bertadarus Al-Quran, berzikir, bersedekah, melakukan qiamulail, bekerja dengan penuh dedikasi dan berdisplin, maka kita akan dapat merasai kesan positif daripada ibadah puasa.

Sesungguhnya Ramadan bulan yang diberkati, bulan berjuang melawan nafsu, membersihkan hati yang kotor, semuanya ini merupakan suatu kemenangan setelah melakukan ibadat sepanjang Ramadan. Maka janganlah kita mensia-siakan daripada beribadah pada bulan Ramadan kerana sesiapa yang mati tidak mendapat keampunan daripada Allah Subhanahu wa-Taala akan dicampak ke dalam api neraka sebagaimana sabda Rasulullah Sallallahu Alaihi Wasallam dalam hadith riwayat Ibnu Hibban:

إِنَّ جِبْرِيلَ عَلَيْهِ السَّلَامُ أَتَانِي فَقَالَ مَنْ أَدْرَكَ شَهْرَ رَمَضَانَ فَلَمْ يُغْفَرْ لَهُ فَمَاتَ فَدَخَلَ النَّارَ فَأَبْعَدَهُ اللَّهُ قُلْ آمِينَ . فَقُلْتُ آمِينَ .

Yang bermaksud: *Sesungguhnya Jibril alaihis salam datang bertemu dengan aku dan berkata, “Barang siapa yang bertemu dengan bulan Ramadan dan tidak mendapat keampunan daripada Allah Subhanahu wa-Ta’ala dan dia mati lalu dimasukkan dalam neraka maka jauhlah dia daripada rahmat Allah Subhanahu wa-Taala . Jibril berkata kepadaku katakanlah Amin, lalu aku berkata, Amin.*

Firman Allah Subhanahu wa-Taala dalam surah al-Baqarah ayat 186:

أَعُوذُ بِاللَّهِ مِنَ الشَّيْطَانِ الرَّجِيمِ

وَإِذَا سَأَلَكَ عِبَادِي عَنِّي فَإِنِّي قَرِيبٌ أُجِيبُ دَعْوَةَ الدَّاعِ إِذَا دَعَانِ فَلْيَسْتَجِيبُوا لِي

وَلْيُؤْمِنُوا بِي لَعَلَّهُمْ يَرْشُدُونَ

Yang bermaksud : dan apabila hamba-hambaKu bertanya kepadamu mengenai Aku maka (beritahu kepada mereka): Sesungguhnya Aku (Allah) sentiasa hampir (kepada mereka); Aku perkenankan permohonan orang yang berdoa apabila ia berdoa kepadaKu. maka hendaklah mereka menyahut seruanku (dengan mematuhi perintah-Ku), dan hendaklah mereka beriman kepada-Ku supaya mereka menjadi baik serta betul.

بَارِكْ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا فَوْزَ الْمُسْتَغْفِرِينَ وَيَا نَجَاةَ التَّائِبِينَ.